

四庫全書

史部

欽定四庫全書

史部

江南通志卷一百五十一

詳校官給事中臣丁雲錦

檢討臣德生覆勘

總校官編修臣王燕緒

校對官助教臣卜維吉

謄錄監生臣蔣雲師

欽定四庫全書

江南通志卷一百五十

人物志

宦績十二
潁州一府滁和廣六泗五州

潁州府

秦甘茂下蔡人秦武王以為左丞相使約魏伐韓茂恐人間之與王盟於息壤起兵擊韓遂拔宜陽

甘羅茂孫年十二使於趙趙割五城以廣秦河間

乃封羅為上卿

漢何比干字少卿汝陰人少學尚書於鼂錯無通法律為汝陰獄吏決曹掾平活數千人武帝時為廷尉正時張湯持法深而比干務存仁恕後遷丹陽郡都尉獄無冤囚淮泗號曰何公

後漢郭憲字子橫宋人王莽拜憲郎中賜以衣服憲焚之而逃光武即位徵拜博士遷光祿勳屢直諫帝曰嘗聞關東觥觥郭子橫竟不虛也

三國魏夏侯惇字元讓譙人少即以烈氣聞太祖初起惇嘗為裨將從征呂布為流矢所中傷左目後領陳留濟陰太守加建武將軍時大旱蝗惇乃斷大壽水作陂身自負土率將士勸令種稻民賴其利文帝即位拜大將軍惇雖在軍旅親師受業持身清儉有餘財輒以分施卒謚忠侯

吳呂範字子衡汝南細陽人少為縣吏從孫策東渡領宛陵令討破丹陽賊遷都督孫權征江夏範與

張昭留守及征關羽又留守建業累官至大司馬
初策使範典財計權私有所求範必關白權以範
忠誠故厚見信任子據為安軍中郎將數有功遷
驃騎將軍

晉曹攄字顏遠譙人為臨淄令縣有寡婦養姑甚謹
姑以其年少令改適婦守節不移姑慙之密自殺
親黨告婦殺姑婦自誣服攄至廉得其情釋之獄
有死囚攄於歲夕暫放回家皆如期而至為襄城

太守時屢經寇難攄綏懷振理旬月尅復永嘉中
為征南司馬討賊戰沒

南北朝魏董紹字興遠廬陽人好學有文為宣帝所
賞除洛州刺史頗得民情後遷御史中丞

梁夏侯詳字叔業譙郡人年十六父喪廬墓有雀三
足集其廬衆咸異焉服闋刺史殷琰召補主簿宋
太始初琰舉豫州叛明帝遣劉劭討之詳勸琰歸
款一州以全令新汲治有異績為建安戍主攻魏

荆亭戍賊衆大潰高祖義兵起與蕭穎胄同創大
舉西臺建領南郡太守軍國大事穎胄多決于詳
遷湘州刺史善吏事為百姓所稱累官侍中尚書
右僕射

夏侯亶字世龍詳長子領安陸太守甚有威惠邊
人悅服遷吳興復有惠政普通六年大舉北伐加
使持節代裴邃與魏相拒頻戰克捷降城五十二
為都督豫州緣淮南豫霍義定五州軍事豫南豫

二州刺史輕刑薄賦務農省役頃之民戶充復卒
謚曰襄二子誼損誼襲封豐城公太清中侯景入
寇誼與弟損率部曲入城並卒圍內

夏侯夔字季龍亶弟以功封保城縣侯大通中為
豫州刺史州積歲寇戎人頗失業夔於倉陵立堰
溉田千餘頃歲收穀百餘萬石以充儲備無贍貧
人境內賴之民歌之曰我之有州頻仍夏侯前兄
後弟布政優優卒謚曰桓子譔嗣官至太僕卿

唐李紳字公垂亳州譙人元和初擢進士第短小精悍詩最有名時號短李李錡鎮浙西辟為從事錡寢不法數諫不聽會朝廷遣使召錡錡偽稱疾不應命令紳作疏紳陽怖不能成章錡怒囚之錡誅或欲以聞謝曰本激於義非市名也乃止穆宗時為翰林學士會昌中歷淮南節度使治尚剛嚴尋入相卒謚文肅

宋李穀字惟珍潁州汝陰人少任俠為鄉人所困孫

憤從學所覽如宿習舉進士擢監察御史歷仕漢
周拜中書侍郎平淮南多穀策令學士陶穀為贊
賜之加開府儀同三司宋建隆中卒贈侍中

張綸字公信潁州汝陰人有材畧太宗時為江淮
發運使奏除通泰楚三州鹽戶宿負疏五渠導太
湖入於海築漕河隄二百里於高郵北旁錮巨石
以泄橫流泰州有捍海堰延袤百五十里久廢不
治歲患海濤綸奏修之身自臨役堰成民利之所

至興利除害多善政再遷東上閤門使

王臻字及之汝陰人舉進士累遷淮南轉運副使
時建議濬淮南漕渠廢諸堰臻言揚州召伯堰實
謝安為之人思其功以比召伯不可廢也徙閩州
閩多先食野葛而趨仇家求鬪即死其處以誣仇
人臻辨察其狀被誣者多得釋官至御史中丞臻
剛嚴善決事所至有風節

張傅字巖卿進士及第稍遷祕書省著作佐郎知

奉符縣徙楚州會歲饑不待報發上供倉粟賑貸
所活以萬計因拜章待罪詔獎之歷官工部侍郎
致仕卒傅強力治事七為監司所至審覈簿書勾
摘奸隱州縣憚之傅曰此正所以愛州縣也吏不
敢慢則州縣不復犯法矣時人以為然

魯宗道字貫之亳州譙人舉進士為定遠尉真宗
時為諭德上嘗使使召之方與鄉人飲酒於肆使
者曰上訝來遲當何辭以對宗道曰即以實對飲

酒人之常情欺君臣子之大罪使者如其言上嘉其忠實仁宗即位拜參知政事太后嘗問唐武后何如主對曰唐之罪人也宗道剛直無所畏避人嘗憚之目為魚頭參政因其姓且言骨鯁也卒謚肅簡

張信臣字公立亳州人為浦江尉其長多貪黷憚其清廉通判遂州州民李十師以左道惑衆遠近患之信臣發其罪遂人以安

魯有開宗道從子以廕知韋城縣尋知確山縣富
弼薦之以為有古循吏風知金州辯蠱獄之誣天
方旱獄白而雨知南康軍代還時方行新法王安
石問江南如何曰法新行未見其患當在異日也
知衛州水災人乏食擅貸常平錢穀與之且奏蠲
其息徙冀州增隄明年河決水果至不能冒隄而
止召為膳部郎中官至中大夫

曹穎叔字力之亳州譙人進士及第歷夔州路轉

運判官夔尚淫祠悉禁絕之累遷右司郎中陝西
都轉運使自慶厯鑄大鐵錢民盜鑄不已穎叔請
罷鑄諸郡鐵錢以三鐵錢當銅錢之一從之進龍
圖閣直學士知永興軍

元摩該太和人初為庫庫部將至正間任平章事忠
直敢言不畏權勢後卒於晉寧子仲禮扶柩歸葬
明安然潁州人洪武初為起居注歷山東河南參政
浙江布政司拜御史大夫時太祖設四輔官以然

為之練達庶務多所裨益卒諭祭賜葬

李敏潁州人洪武五年由辟舉為工部尚書改江西行省參政九年復除工部尚書以疾卒諭祭賜葬

吳斌霍丘人由太學生擢刑部主事持法不撓累陞都察院左都御史

章順舉字元凱潁上人洪武中以人材薦歷官勤慎累陞河南布政使尋調廣西有惠政

張泌字叔清潁州人洪武中由歲貢授兵科給事中陞光祿寺卿在任二十餘年於御膳必躬視精潔祭享宴會必豐腆馭下以寬處事以公衆咸服之受成祖寵遇尤渥嘗御題其畫像云

張思恭蒙城人洪武間貢入太學授刑科給事中正直清介遇事敢言人有暮夜以金遺之者却不受其人强委金而去詰旦言於朝上嘉其有守陞刑部侍郎馭下嚴明人畏服之嘗兼綜軍務能謹

邊防為時名臣

陳巖蒙城人初名亮被薦入見太祖賜名巖命招諭湖廣峒寇及境寇持兵猝至巖無怖色宣諭德意悉棄兵羅拜又遣督逋租於常德察其土瘠人貧請令輸鈔帛代租為慈溪縣丞民困於田租之增額為奏罷之歷官台州府通判

趙亮亳州人任慶雲縣典史督民耕織歲荒捐俸買穀給貧民以賢能聞陞崇仁縣知縣盜息民安

尋陞撫州府知府卒

卜謙潁上人領永樂辛卯鄉薦授工科給事中嘗從皇太孫監國南京忠於輔導丁內外艱廬墓六載宣德間直文華殿陳事每見嘉納陞陝西僉事轉山東副使忤近倖左遷陝西參議民聞謙至歡迎者塞途尋以足疾致仕

韓璽潁州人由鄉貢授工科給事中選侍皇長孫講讀尋遷山東按察副使宣宗御極思念舊人召

還侍文華殿忤權貴出為廣東參政致仕歸室如
懸罄泊如也

王質字夢瑾太和人永樂甲午舉人歷官御史上
疏陳十事皆有裨大政松門聚盜質奉命往察還
奏止罪渠魁餘悉宥之境賴以寧正統二年陞山
東布政使時濟南多虎質至禱於神三日捕虎十
七餘皆引去陞戶部侍郎尋轉刑部尚書性清介
所食惟蔬人呼青菜王李賢有傳

陳嶷字九峰蒙城人宣德中舉賢良方正授刑部
照磨屢決疑獄楊士奇薦之擢御史蜀獠叛胡濙
舉嶷往勦嶷集將士授方畧一戰而克陞陝西副
使

郭昇字騰霄潁州人天順庚辰進士明初潁之登
甲第者自昇始任工部主事督運徐州呂梁洪從古
險阨大石百餘伏水中每歲溺船數百岸為水所
齧仄隘不能容足昇鑿石以殺水勢甃岸以石板

束以鐵釘灌以石灰為功甚鉅植柳濬井以蔭濟
行人值考課軍民詣闕請留擢郎中仍蒞洪事維
揚河善淤運舟膠淺當事檄昇治之昇疏淤滯置
儀徵白塔河牕河溢則洩於江江漲則引於河渚
蓄有法陞陝西參議未任卒今洪上有郭公祠

高桂字月菴潁上人由監生授德興丞時宸濠作
逆巡撫江西都御史王守仁率師討之桂以督餉
功陞萍鄉令引老告歸散金以周貧族而自奉常

不給

儲珊字朝珍潁州人弘治己未進士為清江縣知
縣選御史巡按山東抗疏奏劉瑾不法狀謫岢嵐
州判瑾誅起南京兵部主事擢浙江僉事劇賊王
浩八亂桃源珊提兵勦之戰屢捷偶與上官左即
拂衣歸敘功仍賜綵幣銀牌

盧翰字子羽潁州人嘉靖甲午舉應天鄉試授充
州府推官署滕縣事有巨盜難獲廉其出沒踪跡

盡擒之當事比之虞詡復署曹縣抗疏發賑全活
萬人齊魯之士不遠數百里來受業門下翰教以
孝友力行親為証解六經告歸後汝潁淮泗間有
學行者多出其門

徐熙霍丘人由歲貢授巴縣知縣縣多虎舊設機
穽捕之益甚熙至齋沐告於神虎悉遠遁

石顯字孔彰潁上人由歲貢任南陽通判改大名
陞夔州府同知贊政有聲享年百歲有奇

張光祖潁州人嘉靖壬辰進士授鉅鹿縣知縣調繁上虞修白馬湖築海塘四十里上虞民建祠祀之擢御史巡按關中疏劾總制以下殺無辜以冒功忤權貴意遂罷歸

尚爵字淑仁潁州人父病藥石饘粥必嘗便溺器必親滌舉嘉靖辛卯鄉試授掖縣知縣遷永平通判灌園得金掩其封不取歸家僻處村落不入城市和易恬澹人稱長者

王謨字體文潁州人嘉靖壬戌進士授保定推官
屯田使者逮百許人羅織成獄謨有憂色母問故
跪曰兒不能殺人媚人恐失使者意以貽母憂母
曰兒為仁人我不難為仁人母竟平其獄擢給事
中劾時相高拱謫興平丞修洪口堰納金山諸泉
秦民利賴之仕至浙江僉事

李學禮字子立潁州人嘉靖己未進士授戶部主
事數歷中外三十年值歲歉嘗輸粟活饑民萬餘

又嘗開膠河以利漕運後以養母告歸

王之屏字汝藩潁州人嘉靖乙丑進士令永嘉有
惠政晉戶部郎陞建昌知府御史劉臺劾張居正
巡撫王宗載希居正旨羅織欲殺臺之屏力爭臺
得減戍歷陞雲南右布政

王希喆字思賢太和人家貧奮志儒業嘉靖壬午
領鄉薦選蒙陰令居官清勁邑有宦豪素恣橫喆
至斂戢在任日惟蔬食每旦置數錢門外令隸卒

買菜以給

許廷桂字世芳蒙城人嘉靖癸未進士令阜城擢御史劾宦官七人觸大璫怒削職人以此賢之差印馬時疏江淮折色一省皆頌其德

李國士字汝志亳州人萬厯丁丑進士為豐城令選給事中故事省中有疏先白政府國士曰倘關白而有所撓將遂不言耶竟以是與政府左出為浙東僉事歷陝西右布政思明之役調兩省兵七

萬討之檄為監軍冒暑雨瘴癘無程抵太平賊聞之氣奪乃諭以脅從罔治降者三萬四千人斬獲以千計進山西左布政乞休歸

王道增字益甫潁州人萬歷庚辰進士選御史視鹺兩浙以劾債帥不法忤當路轉湖廣僉事閩人李贄以儒起家二千石削髮留鬚肆意隱怪橫詆孔孟縉紳靡然惑之道增獨逐之出境後贄竟以左道被逮論者服其持正仕至四川右布政

王維垣字伯師潁州人由歲貢授四川合州同知
知州劉冠南賢而有風力推官索賄不遂讒於御
史奏逮之合民赴闕訟冤事下撫按推官擒為首
者將以激變論如律維垣詣兩臺力辨冠南事無
實百姓為賢守訟冤不當坐冠南因得復官百姓
皆賞罪推官銜之遂拂衣歸

白夏字履中潁州人弱冠中河南鄉試授山西靈
石縣知縣課最為三晉第一丁母憂補北直隸遷

安縣首揆張居正病畿輔諸郡邑皆為祈禱夏堅
不列名遷汾州守汾有悍宗為民患夏束以法皆
斂手去汾人尸祝之

胡應聘字任宇潁州人萬厯丁酉中河南鄉試授
海豐縣知縣值歲大饑賑濟米不足請於上臺出
庫銀俾民易粟鄰邑取息以為給又貸民牛種民
有輕罪者令搜草根自贖由是荒蕪盡闢收穫數
倍遷灤州知州未幾謫東藩理問監泰山香稅一

無染指屢遷屢蹟後以德府審理致仕家居環堵蕭然人稱廉吏

王確潁上人領鄉薦為餘杭令有惠政嘗雪冤獄雪者餽金不受為建却金亭內艱服闋補東明令以治河功擢汾州守時宗室暴橫以法裁抑之被流言挂冠歸

徐治民字元禮潁州人由歲貢授棠陽令戴星出入百廢俱興尚書張鶴鳴奉命餉雲中夜過縣鈴

柝聲達旦問役者曰奉使君令防盜使君神明事必知之不敢懈也歷遷刑部郎治獄屢折勲貴出為平越知府輦下泣而送之者數萬人

劉九光字文孚潁州人萬厯乙未進士由縣令歷職方郎中條上方畧十事悉允行轉山東參政督理糧儲國用充足無設法救荒多所全活擢廣西右布政分守蒼梧徭人窟於菁峒時出剽掠將吏請剿以邀爵賞九光諭以威德無不輸服陞雲南

左布政乞休歸

鹿獻陽字寧光潁州人天啟乙丑進士授大同府推官方奉檄赴新平至聚落城時大同猝被圍屯堡防禦久疎獻陽與吏民分地堅守閱數日援至圍解論功以邊才薦降勅嘉獎賜白金十錠

韓獻策字起卿潁州人崇禎甲戌進士觀政大理寺值流賊陷潁一門殉難者十一人具疏陳情備言其父光祖忠憤殺賊被執不屈並男婦慘死之

狀朝廷憫之勅部議卹尋授行人使唐藩拮据王程而卒

甯子慶字大履潁州人中立孫崇禎甲戌進士授掖縣知縣縣新罹兵慶悉心撫字民獲生全更值軍興旁午郡縣難支慶一切奏辦大吏交章薦之徵為戶部主事轉員外郎專督新餉時邊儲告匱外解後期從前司餉者相繼被譴獨慶委曲應辦從容中欸以才器議改吏部忌者擠之即移疾歸

高天佑字味元潁上人由選貢授觀城縣知縣三年膺上考陞左州知州致仕歸時邑屢告警凡築城濬河備火器理糧餉靡不竭力從事更捐金建敵臺一座於城東北隅以扼要害城被圍急與邑令親冒矢石督戰者凡一月忽暈仆城上舁歸而卒

國朝李文煌字包闇潁州人順治丁亥進士選庶吉士改吏科給事中條陳利弊皆中機宜出為廣東參

議時版宇初定境有負固未服者或剿或撫悉歸
誠焉遷鄖陽副使地常滇楚之交民貧驛衝戶口
多流亡文煌招撫勸墾獲有寧宇再轉冀寧參政
致仕

劉佐臨字與襄潁州人廷石子順治己亥進士授
山東兗州府推官數平反大獄省釋無辜未幾裁
推官改武城縣知縣經亂後民散土荒佐臨招徠
勸墾一二年間人盡復業庚戌夏令民修築城隍

民以農時求緩不聽且嚴督之隄成二日河決隄
不沒者尺許衆驚為神遷山西汾州府同知引年
歸弟壯國字幼公與佐臨同榜進士濟寬字公定
亦登賢書有同胞三鳳之目壯國知山西夏縣築
姚暹渠堤三十里三日而成後以勘荒為民請命
觸怒巡撫遂被劾罷濟寬授宣平知縣撫循有治
聲尋以疾乞歸

郝弢字先五潁州人前天啟丁卯中河南鄉試康

熙初授漢陽府推官廉平不擾無有吏才

王師南征巡撫委催九江軍需吳星夜經理比大軍至而楚北糧芻早集城下戎事初罷案牘山積吳按律原情務從輕比馳驅鞅掌以勞卒官

劉摺字子方潁州人順治己亥進士授洪洞縣知縣縣有龍社里山洞深險頑民逃入不奉租調且時出剽掠摺率精騎直抵洞中擒其魁餘黨悉散汾河水溢沒民田萬餘畝勘山中多棄地勸民開

墾得熟田如沒數焉為令六年境內以治會與上官齟齬遂歸

王公楷字木重潁州人順治辛丑進士授成安縣知縣鄰邑有告夫被殺者株連數十人公楷奉檄理之訪其里中自某死後有屠沽兒往外未歸即命蹤跡捕之果得因奸殺死狀獄遂決縣苦漳水公楷請豁瀕河地租晝夜行泥淖中率民修築堤防疏通畎澮未幾水竟西徙出境士民德之以丁

內艱歸

李甲聲字公振潁州人由拔貢授廣西天河縣知縣叛民殺官吏會兵進勦甲聲奉檄監軍以叛民因憤作亂餘皆誘惑軍雖壓境弗令輕戰故土官母持金夜叩軍門求勦以復其仇甲聲不許逆黨聞之相繼解去乘間搗賊巢殲其魁亂遂定土官母以叛民子女分給軍士甲聲宣諭以

國法悉令放還再任壽張遷漳州同知隨征臺灣率

敢死士冒險先登島寨漸復陞廣州知府調慶陽
所至勸耕平訟革除陋例西鳳饑民就食於慶捐
穀倡賑全活甚多

張琦字佩玉潁州人康熙庚戌進士授陵川縣知
縣行取為戶部主事歷郎中時江撫宋犖以旱災
入告同官嚴駁之琦曰今歲大旱

皇上宵旰憂勤不可駁也別具允稿題覆得免正供銀一
十八萬九千兩遷福建建寧府同知多善政三年

移病歸

李紳文字陟屺康熙戊辰進士選授蒲江知縣縣僻居山谷迭遭兵燹榛莽滿城紳文為之立市廛通鹽鐵商旅漸集學宮久廢捐俸倡建置學田以資貧士擢御史巡視東城授山西學使留充丙戌會試同考波累去官尋起知保定府平反疑獄疏通夾河以勞卒

唐勲字萬有潁州人康熙己未進士知廬陵縣修

白鷺書院進諸生講學不輟丁母艱歸服除補臨
縣知縣遇歲荒未及申進即行發賑全活數萬人
未幾病卒

黃陞字子納亳州人由拔貢授河南項城令為政
寬平稅免耗羨訟無贖鍰陞四川茂州知州建文
廟清糧餉減稅課在任七年有麥秀七岐之異

顏光旸亳州人康熙庚辰武進士由侍衛任龍關
遊擊捐貲設立里仁會以助兵民婚喪之無力者

又建書院課兵民子弟陞廣東春江副將值歲饑
有司以未奉上檄不便開倉貯力擔平糶陞福寧
鎮總兵陳奏保甲指掌冊營中設立儲倉二事下
督撫行之卒於官

滁州

宋張昱之字景山全椒人父似有詩名仕南唐入宋
官史館昱之舉祥符進士累遷殿中丞慶厯間以
富弼范仲淹等薦除天章閣待制後以光祿卿致

仕显之忠廉鯁直尚節義吏治精明議論慷慨子
次元以父蔭歷官提點江淮荆浙福建廣南坑冶
鑄錢司事躬自巡歷務革積弊卒於道清正有父
風

張瓌字唐公全椒人參知政事洎之孫舉進士除
祕閣校理歷淮南轉運使三司責諸道羨財淮南
獨上金九錢三司移文譙責瓌以賦數民貧對入
修起居注知制誥英宗時遷諫議大夫生平遇事

輒言觸忤勢要屢黜不悔弟瑯神宗朝歷官參知政事

徐象賢金椒人祥符進士調山陽主簿歷韶陳二州司理陳有巨盜未獲縣取他盜掠服象賢知其冤持不可守怒象賢曰乞緩捕期不獲願獨坐尋遇赦盜詣府自首守服其明仕至太子右贊善大夫孫敷宣和進士宰相薦其才自潭州通判擢荆湖北轉運判官以通敏稱

吳蔚全椒人熙寧進士調臨淮主簿攝令事時青
苗法行旁邑奉行峻急蔚施行得宜民以不擾歷
知廣德彭池三州所至興學校得士心

吳革蔚弟與兄同舉進士調揚子主簿遷貴池令
有兄弟爭訟革流涕譬曉俱感泣去知廣德軍值
建平歲饑力請賑濟全活萬計知南雄州發摘奸
伏郡內肅清歷湖南運判卒子五人皆登第

明何世隆滁州人元季糾義兵捍鄉里太祖創業率

衆歸附授萬戶即命守滁以功累遷右副都元帥
州境當兵革之後民物凋殘世隆盡心拊綏衆賴
以安

楊元杲滁州人太祖駐滁值歲旱欲禱于神元杲
奏對稱旨常侍左右掌機宜文字悉當扈蹕渡江
權江南行省右司員外郎歷應天府尹練達政體
時論推重子賁字彥華以詞翰知名官周府紀善
阮弘道滁州人家素寒及壯知學通吏事太祖初

駐滁結事左右從駕渡江授中書省員外郎歷福建江西行省參政俱有聲時金椒侯元善亦從渡江掌簿書文字為員外郎後歷參知政事

魏忠字文卿滁州人介特有守以薦授諸暨州州判調洛陽令遷守大同政尚清簡吏民德之月俸僅取足餘悉歸之官

黃純全椒人永樂庚子舉人歷輝縣蒲圻教諭宣德中詔選文學士特擢兵科給事中疏陳時政皆

中竅要遷江西提學副使

章惠全椒人永樂中由貢授平陽令以廉惠得民心每有勾攝不遣隸卒止用粉牌以次傳遞題其版曰不貪不食于民有益人隨牌至庶免譴責邑中便之無違令者

沈青滁州人以軍功累官都督正統中修建京師九門城樓及宮殿成封修武伯卒謚襄榮

馬諒字子諒全椒人宣德癸丑進士歷官南戶部

侍郎諒為人精敏所莅有政績出入中外三十餘年清操雅節始終不變

劉清字廉夫滁州人正統戊辰進士選庶吉士己巳之變北兵犯德勝門百官分地守禦清督衛士防禦甚嚴擢兵科給事中巡視紫荆關雅有威望佐都督毛福壽討竹查山叛苗所得廩賜悉頒麾下將士感勵遂大奏捷擢刑部侍郎後左遷四川參政卒

石澄字士蕪滁州人天順丁丑進士授刑科給事中一日進讀章疏英宗喜其詞氣侃直呼為石給事繼因彈劾稱旨特書名于屏遷鴻臚寺少卿

劉必賢字天祐滁州人天順丁丑進士歷知諸暨南城二縣以政最入為御史尋出守衢州有治聲黃璵純之子天順庚辰進士擢御史振肅風紀以劾權貴謫常山丞遷知化州轉道德二州所至興學祛弊政化大行

劉愷字伯和滁州人成化乙未進士令武陟有惠政擢御史糾閹人蔣琮罪疏三上謫瀏陽丞歷薊州知州薊為畿輔劇地素多權貴侵撓吏治愷一無所徇累擢福建參政

吳璋全椒人成化丙戌進士授戶部主事抽分蕪湖盡却耗羨歷郎中以清正忤貴臣出守鶴慶毀淫祠興禮教滇人化服

錢山字靜夫滁州人成化丙戌進士除御史出為

浙江按察司僉事築海塘以禦民患轉江西行部
至豐城值大水民饑不俟奏請發粟賑貸遷副使

致仕

張綱字萬善來安人成化戊戌進士由南戶部郎
出守岳州以簡素自持平恕為治調黎平未赴卒
子楠舉進士歷官鴻臚卿清粹有父風

石祿字允升澄之子弘治庚戌進士授行人歷遷
順天府丞劾劉瑾不軌謫茶陵知州時論壯之

于鏊字器之滁州人正德戊辰進士授戶部主事
解邊鎮餉金督徐州倉儲皆以廉謹聞選御史巡
視長蘆鹺課兼理河道所至剋弊剔蠹風采大著
繼巡宣大宗屬中貴皆望風悚服遷浙江按察司
副使擒大盜湯毛九等進山東按察使調貴州致
仕

孫存字性甫滁州人正德甲戌進士授禮部主事
累遷河南左布政使吏才敏練尤精于法比嘗輯

一代典制與疏例互相發者附于律令名曰讀法
周寃字服之滁州人正德丙子舉人授新安令時
洪水為災冕築堤千餘丈民免漂溺擢南御史遇
事敢言中外憚之查勘各衛屯田及紫沙等處蘆
洲清界址除宿弊以忤權要出守鶴慶不赴乞歸
彭儒字伯真金椒人嘉靖乙酉舉人歷兗州濟南
泰安同知居官廉謹尤多幹畧文牒盈前片言立
剖

戚賢字秀夫全椒人嘉靖丙戌進士歷知歸安唐
二縣平徭役清獄訟摧豪猾毀淫祠值歲凶民饑
賑糶有方以卓異徵累擢刑科都給事中因太廟
災疏請進賢退不肖謫山東布政司都事尋致仕
闕南譙書院聚徒講學闡發良知宗旨

胡松字汝茂滁州人嘉靖己丑進士授東平知州
歷湖廣參議協勦湖北叛苗尋督山西學政值太
原有警松條奏十二事皆切邊計特擢參政協守

雁門俄落職後起陝西參政累遷江西巡撫未莅任聞流賊犯境率兵千餘倍道疾馳出賊不意悉殲之又討平廣西賊帥張璉遷侍郎陞南京吏部尚書松潔已好修富經術晚主銓柄以振拔淹滯為己任卒謚恭肅弟榘字汝嘉倜儻有才畧以兄廕累官寶慶知府時蠻酋李文祿等屢勦未獲榘以計擒之

竇潤字子雨滁州人嘉靖乙未進士授戶部主事

分司徐州事竣還部歿無以殮人服其清

宋璘字玉輝來安人嘉靖丁酉舉人授嚴州推官
雪淳安冤獄攝建德篆及監九廟大工材木潔已
無私子行可亦由舉人授嚴州推官清操肖父

邵夢麟字道徵滁州人嘉靖己未進士授大理寺
評事遷寺副歷河南僉事清屯田數萬頃置兩驛
以甦民困擢浙江參議督兵禦倭獲其酋數十人
終山東參政

江以東字貞白金椒人隆慶戊辰進士授戶部主事歷南考功郎出督江西學政以疾乞歸生平清介絕俗歸後時衣布袍跨驢以行所居止敝廬數椽

石應岳來安人隆慶辛未進士選庶吉士改給事中屢有建白務得大體歷官戶部侍郎

彭夢祖字應壽全椒人萬曆庚辰進士由戶部主事累遷浙江台紹副使刊布台郡易俗四宜固海

防儲軍實

王嘉賓字國賢滁州人萬厯癸未進士授定海令
親給駐防軍餉杜大帥及監軍侵漁之弊調諸暨
設方畧擒巨盜以艱歸起補海寧築海塘銅鞮數
十里以捍水患徵拜御史卒

賈巖字魯瞻滁州人萬厯壬辰進士授戶部主事
時國本未定疏請冊立慷慨數千言尋考功郎趙
南星典計以清正被斥巖抗疏申救語侵輔臣謫

曹州判

李鵬南全椒人萬歷癸卯舉人知尉氏縣釋冤囚有惠政遷雲南府通判卒後流寇犯邑中有尉氏人特訪其故廬拜哭而去

金光辰字居垣全椒人明戊辰進士授行人選御史糾內璫救言官大著風節尋以言事忤旨召對平臺詰責再三辭氣不撓謫浙江按察司照磨父九殿喜曰子以直道事君吾復何憾召為大理寺

正屢擢左僉都御史總憲劉宗周以廷諍獲譴光
辰申救尤力復鑄級謫外

國朝金光昊光辰從弟也明季侍父九陞赴棗陽令任
流寇偪城父命之歸避光昊曰父殉城子殉父何
避為佐父固守棗城獲全後舉壬午鄉試令長子
黠胥欲以前令逋糧責民代償光昊精于檢察民
無擾累歲旱禱雨立應有麥穗五岐之瑞以瘁卒
官貧不克殮潞守鳩金助之

金拱敬滁州人父若嵩居鄉有長者名拱敬性至孝嘗刲股療母疾舉明季癸未進士順治三年授兵部主事尋調吏部歷考功郎中繼以太僕寺少卿管文選司郎中事拔才舉能悉稱其職

吳國龍字玉騮全椒人父沛耆儒有名行國龍明季癸未進士授戶部主事母喪廬墓順治中以漕撫蔡士英薦徵用康熙元年授工科給事中歷禮科掌印給事中封章屢上皆有裨軍國大計丙午

典試山東得人最盛

朱宏憲字守謙全椒人順治辛卯舉人由溧水教諭遷完縣令均徭革耗又邑俗多輕生每以投繯服醢構訟不止宏憲悉置不問舊習頓革子大乾舉進士歷知章邱武清二縣俱有善政

金光房字天駟光辰弟順治己亥進士授九江推官以廉明稱缺裁改補瓊山令益著清節又議均貢香黎人樂附鄰縣有欲以勦黎邀功者力寢其

事鎮兵譁噪單騎出諭軍情立定尋卒於官子作
鼎康熙甲辰進士有文名

和州

宋沈立字立之歷陽人舉進士簽書益州判官提舉
商胡埽采撫大河事迹古今利病為書曰河防通
議治河者悉守為法遷兩浙轉運使茶禁害民著
茶法要覽乞行通商法詔從之擢右諫議大夫出
為江淮發運使居職辦治初立在蜀以官粟售書

積卷數萬神宗問所藏立上其目及所著名山水記

魏矼字邦達歷陽人宣和二年上舍及第紹興初累遷考功郎會星變陳言高宗識其忠擢御史在職七月論事凡百二十餘章遷祕書監力論和議之非忤秦檜屢出奉祠

張邵字才彥烏江人宣和三年上舍及第建炎初調衢州司刑曹事詔求可使軍前者邵慨然請行

以不屈留北十五年與洪皓朱弁俱全節南歸累
官敷文閣待制知池州再奉祠卒子孝曾後亦以
出使歿

張祁字晉彥以兄邵奉使恩補官祁負氣尚義趙
鼎張浚皆器重之與胡寅友善秦檜素憾寅因誣
祁罪下大理檜死獲免累遷直祕閣淮南轉運判
官

張孝祥字安國祁子舉紹興二十四年進士第一

累遷起居舍人出知撫州年未三十莅事精確移
守平江庭無滯訟以張浚薦召入除直學士院兼
都督府參贊軍事歷帥靜江湖南北皆有聲績卒
年三十八孝宗惜之有用才不盡之嘆

張孝伯孝祥從兄登隆興元年進士第開禧中累
官參知政事時韓侂胄當國孝伯勸弛偽學禁始
追復趙汝愚官一時貶斥者得還故職子即之官
至直祕閣有書名

陸同字彥和歷陽人以父有常蔭補官知望江縣
請蠲營田賦外之征移知廬江中外皆薦孝宗書
其名于御屏擢知房州復以大臣薦遷京西轉運
判官首罷襄陽薪蒸之禁平反鹿門山獄尋請祠
歸子世良時任廣東提刑以父老亦乞侍養旋里
元張茂之字宗榮舍山人累官淮南轉運使以寬厚
稱

明何宗顯烏江人博涉經史元季領鄉薦避兵嚴州

胡大海克嚴州得之薦于太祖及定婺州改為寧
越府即命知府事宗顯首開郡學延儒士葉儀宋
濂為五經師時久亂學廢至是始聞弦誦聲加意
拊循郡以大治

馮榮和州人吳元年舉人材知華亭縣海濱盜猝
起執榮欲害之邑民何潤挺身詣盜力言榮良吏
宜釋始得免及盜平榮請于大帥止戮渠魁而貸
良民之誑誤得脫死者數萬復興學勸農平徭清

獄民並感悅

徐伯常和州人嗜學篤行洪武初舉人才由典史歷知縣以廉幹聞案無留牘

呂秉直和州人洪武初舉人才知泰興縣為人淳篤莅事果決尤敦尚風化民俗歸厚

張貞字有祥茂之孫洪武中膺文學薦授真定令以慈惠得民心秩滿日老稚扳留至不能前遷都督府斷事致仕永樂初以循吏召用貞引疾固辭

特詔褒嘉

王敦字子學舍山人永樂初由楷書授推官遷東昌府通判所至皆以廉謹稱鞫獄多平反歷官三十年家無餘資

張祐字一德舍山人永樂甲辰進士授刑科給事中
以諫直忤時出守處州威惠並行俄奔父喪因郡有寇警特命起復督軍勦平加俸三級郡人立祠祀之

王璽字廷用和州人正統戊辰進士觀政戶部奉
勅賫金帛犒兩廣軍士尚書金濂薦其才授本部
主事屢奉差督辦通州天津草束浙江鈔課及攢
督紫荆糧儲皆有廉能之稱歷兩浙鹽運使盡釐
宿弊又州人王珍由進士令浦江亦有治聲

唐忠字以信舍山人天順己卯舉人授密雲令捕
治豪猾請蠲水衝田糧民甚德之以艱歸家居貧
甚至鬻衣以給

胡澄字景濂舍山人天順己卯舉人授寧都令慈惠多善政九載秩滿民籲留之又三載遷寧海州同知以暴疾卒州人哀悼

武臯字舜弼和州人弘治癸丑進士授長史輔導禁藩日進講讀勤恪盡職禁藩嘉之深加禮重

馬應龍字公濟和州人正德辛未進士授戶部主事大軍討河南流寇奉命督餉給軍賊平有銀幣之賚又從都御史彭澤西征蜀盜率偏師進勦斬

獲千計遷郎中尋出理遼東糧儲潔已奉公邊鎮
竦服擢山東按察司副使整飭霸州等處兵備痛
懲積弛之弊軍政一新百廢具舉又剪除巨盜及
勢家之素為囊橐者境內肅清民皆設位祀之于
家

萬慶字子餘和州人嘉靖己未進士授行人奉使
楚中盡却餽遺擢刑部員外郎有豪猾倚中貴勢
犯私鑄罪諸司莫敢詰慶獨寘之法無所貸遷守

泉州舊有不利于民者數事慶悉罷之輿情大愜
又計擒倭寇海濱獲安

張尚儒和州人萬厯中由貢授巴東令以政最遷
歸州知州新灘有險石尚儒特命工鑄鑿以便行
旅人多頌之

國朝成性字我存和州人舉順治己丑進士授中書舍
人選御史出按福建有清直聲轉兵部主事以大
學士馮溥薦擢工科給事中

李衷燦字藜仲舍山人順治中以貢授洵陽令遷
冀州知州復補荆門州時有勦寇之師衷燦竭力
轉餉以繼大軍由是巨寇李來亨等皆即殄平擢
衛輝同知問學於耆儒孫竒逢執弟子禮時人稱
之

張其善字同人舍山人順治辛丑進士授東安令
邑中民獯雜處素稱難理其善莅官清惠境內翕
然遷高州府通判未任卒

胡騰蚪舍山人貢生歷萊陽韓城二縣丞潔己愛民以廉惠稱卒於官韓人立祠祀之

廣德州

三國吳朱治字君理故鄣人隨孫堅征伐拜司馬從破董卓孫策薨治與張昭立權每進見權恩敬特隆治性儉約雖富貴車服唯供事封故鄣侯

宋倪濤字巨濟廣德人年十五試太學第一舉進士累官司勲員外郎時議有事燕雲大臣羣相附和

濤獨抗言其非王黼怒其阻軍事貶監朝城酒稅
再徙茶陵船塲卒明年金師至朝廷憶濤先見錄
其子

李嘉言廣德人隆興初進士後從范成大使北歷
知常饒二州皆有去思尋以尚書充使而還

吳應龍字雲翔建平人嘉定進士遷知興國軍治
最趨命入奏陳八事理宗嘉納之拜御史官止廣
南西路運判

章汝鈞字和叔建平人淳祐進士授國子監書課
官召試館職首以厚人倫扶國綱為對以祕書正
字家居時多以差役破家汝鈞與梅應發倡行義
役公私便之鄰郡取則焉除祕書郎卒

梅應發字定夫廣德人淳祐間進士居官忠貞廉
退秩至中奉大夫直寶章閣致仕元初召起之辭
以疾

明姚恕建平人洪武甲子舉人任杞縣令性介才達

綽有政譽擢御史所至振肅官至江西按察使靖
難兵起宣城陳尚書迪不屈死恕陳壻也亦被戮
孫昇字伯高建平人永樂甲申進士任御史時妖
婦唐賽兒作亂昇統張旗馬撫王真等敗賊於諸
城山東悉平擢遼府長史終建昌知府

胡廩廣德人永樂中貢任給事中陞左副都御史
謹直敢言時建平馬政擾民廩援祖制疏言州居
山磧無平原可放牧免之尋改福建參政

濮瑾字良玉廣德人由選貢知寧陽縣兩賑饑民
全活甚衆委督逋糧至誠勸諭民咸樂輸上官交
薦以親老乞歸

姜洪字希範廣德人成化戊戌進士知盧氏縣勸
耕教織有循吏風孝宗時擢御史疏時政八條多
見採納按湖廣楚藩請益莊田洪奏罷之陞雲南
參政土官陶洪約八百媳婦共為亂洪乘間捕治
亂遂戢合兵討洞蠻桃古平之轉山西布政劉瑾

求賂弗與落職歸瑾誅擢山西巡撫惟收月俸六石卒官無以為殮謚莊介

呂盛字文郁建平人弘治己未進士任湖州知府時孝豐湯許為寇盛深入其阻諭以禍福兵不血刃而就俘餘寇悉平後備兵天津武宗南巡時方饑饉盛以無礙官錢給四方流民俾充夫役民不知擾未幾改雲南屯田副使

宗璽字朝用建平人弘治己未進士授大理寺正

時逆瑾暴虐多害善良璽平反不撓出為江西副
使值副使胡世寧疏宸濠不軌十事濠亦誣劾世
寧章下藩臬議濠嗾致世寧於辟衆持疑相向璽
獨奮筆白其誣遷福建兵巡平大帽山寇有旨增
秩改廣西按察復平叛獠終雲南布政使清公帑
巨萬以贍軍旅

潘潤字時雨廣德人正德甲戌進士歷官儀部郎
擢守處州當道議增郡賦力爭而止比入覲民有

餽遺堅拒勿受衆構却金亭以懷之遷雲南兵備副使

李得陽字伯英廣德人嘉靖乙丑進士任戶部權淮關盡蠲浮苛知九江府築三洲堤建澄江樓崔符息警歷陞湖廣巡撫鍤成賦役全書永為規式奏止荆沙衡永採木之害以乞養歸追嘉撫楚之績起南工部侍郎會陵殿城諸工役並興以勞瘁卒官贈戶部尚書

李模字子範廣德人嘉靖間進士仕刑部主事委漕運理刑減稅二萬兩擢吏部稽勲司稱銓曹第一廉吏

夏良心字宗堯廣德人隆慶辛未進士除刑部主事歷陞山西參議轉兩浙水利道築海堤功加秩賜金按察山東布政河南皆遇饑賑賑濟有方擢江西巡撫時兩璫權稅歲幾十五萬奏減七萬有奇加兵部右侍郎捐罰鍰四千金設倉置田儲粟

備賑卒贈兵部尚書

李天植字性甫廣德人隆慶辛未進士授平陽推官擢吏科給事中鄒元標趙用賢糾張居正奪情被杖天植疏救甚力有旨選閣寺多人天植言儒士進學數少中貴選用數多事體倒置語攻政府出參饒南道時毀天下書院欲併廢白鹿洞膳田天植力持不可後歷曹濮兵備以終

管九臯字如鳴廣德人隆慶庚午舉人知富陽縣

以卓異擢御史彈劾不避權貴歷廣東副使清操益勵

李徵儀字子來天植孫萬厯辛丑進士知清江縣擢御史疏言鄒元標顧憲成趙南星直諫蒙譴宜峻擢以備啓沃閱視山海居庸兵馬條上便宜數事皆報可劾李三才盜用皇木發內監冒破金磚等費止內苑營建臺榭皆俞允巡視長蘆鹽政督學順天掌河南道臺綱肅然陞大理寺左丞以不

附魏璫削籍比璫誅原官起用

夏之彥字士美廣德人萬厯壬子舉人知應山縣
痛革徵收贏羨行戶供應都御史楊漣直諫罹璫
禍鍛鍊追贓下本貫承比之彥設櫃募金且鬻產
二千金代贖臺檄下漣幼子于獄為築別室居之
名曰疾疾軒時餽索饘或為危之之彥曰使某附
楊公得禍天下萬世應有知我者遷武昌府丞鑿
壓霧嶺通道五十里陞浙江鹽運司運同却常例

疏鹽引商民兩利

戈簡字行可廣德人崇禎辛未進士知晉江縣謝絕請謁綜賦汰役練兵修學息海氛靖山寇皆有成績

王之棟字嘉隆建平人崇禎間恩貢僉判卹州民愛戴如父母攝篆榮蒲二邑會討叛蠻督餉黎城瀘河諸處調運不置以不善事上官左遷去任

國朝包元帥字拂雲廣德州人順治間恩貢授平陰令

時濟上屯兵縣苦供億元舛區畫以濟斷獄明允
蝗入縣界虔禱之遂出境

六安州

明張子貞字彥誠英山人洪武間由國子生授車駕
司主事言事謫戍嶺海復起遷山東僉事以切直
忤時謫隸苑馬寺上見其題龍江衛詩詔復其官
敫歷中外幾四十年清心苦節寵辱不驚尚書蹇
義嘗嘆曰居官不必遠法古人近效張子貞可矣

潘岳字居仁六安人永樂丁酉鄉薦授鄭州訓導擢監察御史彈劾不避權貴忤旨發充後軍都督府掾府帥待以優禮岳曰非朝廷意也執役無異羣吏復職按浙閩單騎問民疾苦暑日手自持蓋家居置田給族人以承庸調

汪霖字潤夫六安人景泰進士歷御史按雲南浙江所至振紀綱雪冤滯不為苛察成化初監征粵軍陞大理寺丞以左僉都御史巡撫畿內凡八受

璽書獎諭生平寬厚謹慎為世所稱

潘貞字景徵岳之子天順進士累遷福建副使覈銀課加耗重息以補他課之逋進四川按察使出滯獄擒豪僧陞布政司貴州苗亂徵兵糧於蜀開府固知所措貞請以苗攻苗發近疆播州龍州之卒應之

潘鏜字宗節貞子弘治丙辰科進士官監察御史首劾閹黨高鳳又條時政四事皆不報以劾逆瑾

矯制削籍瑾敗起授廣東按察司僉事

彭辨之字問夫霍山人正德戊辰進士知餘杭時
澍苦織造辨之請於上官奏裁之守彰德補饒州
為政務安靜終山東參政

潘銳字宗魯六安人正德丁丑進士授行人力諫
南巡荷校跪闕下曝十日杖五十降南國子監學
正世宗即位復其職因論柄臣再杖謫其剛直蓋
天性云子子正字汝中嘉靖壬辰進士擢給事中

論罷冢宰汪鉉謫西平縣丞累遷湖廣兵備討平
亂苗遷貴州參政歸

丘玳字文玉六安人嘉靖戊戌進士授戶部主事
餉兵榆林一洗扣除剋減之弊遷守温州海上巡
徼者輒誣漁販為盜悉原而釋之調守寧波亟繕
城郭倭至得免蹂躪歷官不攜家累榆林之役或
報夫人訃且至叱曰此豈顧家時耶其首公盡職
如此

張澡字子新襲職六安衛指揮積功至參將先後
駐浙江十年禦倭大小數十戰皆捷鎮海之功尤
偉總兵吳淞上沿海沿江諸圖議移鎮滇南授征
蠻將軍印鎮粵西叛苗未靖設方畧撫勦無施尋
以南京都督致仕

徐必進六安人弱冠登第歷禮刑二部郎出守嘉
興七年郡人戴之三塔寺五太守祠必進居其一
遷福建副使致仕

金一
卷一
五十一
郝錦字綱卿六安人崇禎丁丑進士授豐城縣令
縣糧賦甲江右錦覈包攬清里甲裁陋規政最一時
移新建令時獻賊震袁吉士民逃竄錦調兵食治
守械衆心乃安遷御史侃侃有諍臣風

泗州

漢韓牧字子台臨淮人哀帝時為御史嘗建言水利
宜于九河故道穿之縱不能為九但為四五亦可
以殺水勢

三國魏陳矯字季弼東陽人明帝時為尚書令帝嘗
至尚書門矯啟曰陛下欲何之帝曰欲案行文書
耳矯曰此臣職分非陛下所宜臨也帝乃迴車其
直亮如此後進爵東鄉侯卒謚文貞

晉陳騫東陽人矯子沉厚有智略仕魏為尚書郎遷
中山安平太守並著治績晉武帝即位以佐命功
封高平郡公加太尉卒謚武

南北朝齊劉元明臨淮人歷仕山陰建康令有吏才

官至大司農

宋許遵字仲塗泗州人舉進士擢大理詳斷官知長興縣賑濟水災益興水利溉田甚溥熙寧間知壽潤二州累官中散大夫

李植字元直泗州臨淮人明敏篤學客蘇軾門鼂無咎見之曰此國士也以女妻焉靖康初向子諲轉運京畿時盜起路阻使植督犒師銀百萬糧百萬石自淮趨濟卒以計達秦檜當國植丐祠奉親

檜死除戶部郎中丁母憂哀毀廬墓有白鷺朱草之祥劉鎮遺之書曰忠臣孝子元直兼之矣為京西河北路轉運使措畫有方廷議倚重遷江南東路轉運使上書言江防十策卒謚忠襄

王寔字廷叟東陽人嘉定四年中絕倫異等科授承德郎知濠州職事修舉金兵至光州以寔知州事寔分遣間諜整飭戰守之具大戰州西光人乃安

明鄒魯盱眙人洪武中以聰明正直舉授河內縣主簿尋以事降會稽縣典史者民奏其廉能遂陞知縣執法不阿為人誣奏逮至刑部事直特陞大理寺丞

王晏盱眙人洪武初以薦授教職陞滋陽知縣廉能有節槩博學多聞仕至陝西參政

張彥禮五河人洪武間以人才徵令陽武多惠政秩滿民詣闕請留在任十八年卒於官囊橐蕭然

不能歸里因家其地

金純字德修泗州人洪武間由太學生授吏部文選郎累陞刑部侍郎永樂間扈從北征尋奉命發河南丁夫開濬黃河故道漕運賴之遷禮部尚書調工刑二部在刑部時務寬大宣德中致仕卒贈山陽伯

丁寧字惟和五河人永樂甲辰進士宣德七年巡按廣東風紀大振嘗歲暑中過梅關見行者病暍

顛踣皆思得水乃躬披荆棘偶見石潤曰此必有水命鑿之不踰尺而泉溢遂浚焉名福民泉至今行旅賴之

陳敏字內修天長人景泰癸酉舉人為鄆縣知縣縣多虎患敏禱于神虎遂遠去改令連城興起文教躬自誨迪連城科目久缺至是遂多登第者

張昊字朝元天長人弘治丙辰進士授烏程令擢御史陞江西僉事分巡九江時姚原洞蠻寇掠昊

與參政董撰討之斬獲三百餘人欲搗其巢穴約
董進兵不至為賊所執不敢加害仍委之而去回
籍聽勘廷議復職昊事父母孝事繼母如其母撫
二弟有恩義子天駙字雲卿嘉靖乙酉鄉薦清宦
之後饔飧不繼而讀書不輟及仕兗州府通判不
持一錢歸

陳道盱貽人為文選主事出知金華能斷大獄累
遷南刑部尚書

陳大章盱眙人道之子由進士授刑部主事歷兵部職方郎擢太僕卿長於吏治所在著聲無工詩詞善畫墨菊一時推重

沈應乾字菴川五河人嘉靖庚戌進士初任海南令累陞保定知府多惠政積俸悉留郡帑備賑仕至密雲兵備副使嚴嵩父子執政未嘗一謁其門嵩怒言官希嵩旨劾之遂歸里

常三省字魯軒泗州人嘉靖丙辰進士歷官湖廣

右參議泗苦水患三省投揭於撫按請開濬為總
河劾奏罷職既淮流陡漲水侵祖陵三省復以分
黃導淮之說言於行河使者卒用其議以襄成功
鄉人至今頌德

胡士奇字浮冶天長人萬曆丙辰進士授萊蕪縣
知縣擢御史巡按宣大嘗抗疏劾魏忠賢

馮應京字可大盱眙人萬曆壬辰進士歷任湖廣
僉事風采大著稅監陳奉恣橫不法巡撫以下不

敢出聲應京疏列奉九大罪上怒逮問士民擁檻
車號哭不得行既去則家為位祀之禁獄者四年
釋歸復職所著有經世日用編蓄艾編月令廣義
諸書卒贈太常少卿謚恭節

崇正學字佩一天長人由監生考授州判時武舉
陳啟新言事稱旨擢省垣正學抗疏劾之降選平
陽縣主簿值海寇侵擾正學單舟諭寇寇悉降朝
廷序其功後引疾歸

國朝孫振先泗州人順治初署武進縣時守宗灝貪狼
多藉富民家且將請兵屠城振先以死爭之城得
以全

江南通志卷一百五十

欽定四庫全書

江南通志卷一百五十一

人物志

武功一

州

江蘇松常鎮淮揚徐八府太海通三

江寧府

後漢抗徐字伯徐丹陽人少為郡佐史有膽智策畧
初試守宣城長後為中郎將宗資別部司馬擊太
山賊公孫舉等破平之封烏程東鄉侯遷太山都

尉歷長沙太守同中郎將度尚討擊桂陽賊胡蘭
朱蓋等大破之宿賊皆平卒於官詔增封五百戶
張磐字子石丹陽人以清白稱延熹中為交州刺
史桂陽賊胡蘭餘黨南走蒼梧磐身擐甲胄涉履
危險斬殄渠帥餘悉竄遁後終廬江太守

芮祉字宣嗣丹陽人從孫堅征伐有功歷九江吳
郡太守子良隨孫策平定江東為會稽東部都尉
良卒弟元代領其兵拜奮武中郎將以功封漂陽

侯

三國吳陶璜字世瑛秣陵人父基交州刺史璜都督
交州晉將毛晃守交趾璜擊降之開置武平九德
新昌三郡九真屬國三十餘縣恩威著南徼

南北朝陳淳于量建康人助王僧辯破蠻平侯景入
陳封醴陵縣公

五代南唐邊鎬金陵人也監嚴思軍擒循州賊張遇
賢以行營招討破建州又為湖南安撫使討馬希

崇降之鎬發廩賑其饑楚人大悅

明楊洪字宗道六合人祖政漢中百戶洪嗣職成祖
稱為將材英宗初累功進都指揮僉事時宿將已
盡洪後起以敢戰知名遇敵每出奇制勝正統初
守獨石有功歷遷左都督充總兵官鎮宣府敵人
畏之呼楊王土木之變車駕北狩道宣府洪閉城
門堅守景帝初封昌平伯進封侯督京營訓練尋
還鎮宣府士馬精強為一時邊將冠以疾召還京

卒贈潁國公謚武襄兄子能字文敬少從洪征伐
有功陞開平衛鎮撫戰灣河三岔口戰紫荊倒馬
二關俱有功累擢左都督總兵宣府天順改元以
迎復功封武強伯能沉毅善謀臨戰決勝敵驚憚
之弟信字文實由指揮僉事歷都督同知封彰武
伯鎮宣府延綏大同在邊三十年屢破敵人樂為
用卒於鎮贈侯謚武毅洪子俊以舍人隨洪立功
至右都督

巫凱句容人由百戶積功至都指揮同知宣德元年陞都督僉事充總兵官鎮守遼東凱性剛嚴饒智畧在鎮三十餘年威惠並行邊備修飭前後守遼者皆莫逮焉

尹鳳字德輝南京人嘉靖中舉武科鄉會試皆第一擢署都指揮僉事歷福建參將倭陷福清南安連舸出海鳳邀擊沉其七舟追至外洋擒斬二百人至橫山擒斬二百六十人凡大小十數戰內地

賴以寧謝病歸隆慶初起原官從李錫平曾一本
萬厯初擢提督京城巡捕

陳忠字南塘府軍衛籍有膽智膂力絕人能泅江
百里嘗於神烈山擒兩虎由是知名投李開府麾
下提兵捍倭戰于牛王河倭以奇兵襲其後忠負
李渡河且戰且走李畫渡河圖以紀其勇後隸胡
宗憲幕下倭來挑戰忠白鎧雙刀直入其陣萬衆
辟易前後百餘戰未嘗少挫由卒伍歷官參戎稱

名將

黃鉞字長白錦衣衛籍家金陵萬曆辛丑武科第
一歷官南左府都督僉事在粵渡海征黎平抱由
羅活諸峒在南水陸營渡江遏蓮妖保護淮鳳在
黔領專勅征安寇擊破織金大方諸寨捷聞優賚
宗萬化字羅中上元人萬曆己酉舉人知景州白
蓮賊數萬聚白家屯將逼城萬化從間道抵監軍
僉事來斯行假其所領官軍分為三隊夾擊賊大

破之全一州捍蔽京師功甚偉以失州豪貴意不
得叙轉潮州同知攝府篆總督熊文燦撫海寇劉
香老萬化爭之遂被誣歸

國朝王自新句容人順治乙酉舉人任通州學正海寇
至城自新守禦有功陞僉事督學湖廣有公明譽
袁國琮字于澤溧水人康熙癸未武進士選侍衛
歷官金華副總兵官署總兵鎮處州綏靖封疆東
南倚重

蘇州府

三國吳朱桓字休穆吳人事孫權幕府以盪寇校尉督諸將討平山賊遷裨將軍為濡須督黃武初以五千人破魏大司馬曹仁步騎數萬遷奮武將軍封嘉興侯嘉禾元年吳兵自廬江引還魏人欲俟其半渡溪水擊之及見桓節蓋在後懼不敢出赤烏初卒子異字季文領父兵累遷鎮南將軍建興元年大破魏軍于東興

顧承字子直吳人豫章太守邵子嘉禾中徵拜騎
都尉領羽林兵後為吳郡西部都尉與諸葛恪等
共平山越別得精兵八千人拜昭義中郎將入為
侍中苟陂之役以功拜奮威將軍

晉顧秘字公真吳人雍族孫偏將軍悌子有文武才
幹為吳興太守石冰畧有揚土周玘等推秘都督
揚州九郡軍事斬冰所置吳興太守區山元帝為
鎮東將軍命為參軍以討華軼功封東鄉侯終交

州刺史子衆字長始歷義興太守蘇峻反王師敗
績衆還吳潛圖義舉吳中人士同時響應與賊戰
破之封鄱陽縣伯累遷尚書僕射卒謚曰靖

南北朝陳陸子隆字興世吳人少慷慨志功名初事
郡守張彪及陳文帝討彪彪將皆降惟子隆力戰
文帝異之使領甲仗宿衛尋預平王琳授左中郎
將天嘉初除明威將軍廬陵太守隨都督章昭達
討周迪走之遂踰嶺討陳寶應晉安平子隆功最

遷都督武州諸軍事華皎反子隆出兵襲其後因與王師相會遷都督荊州刺史卒謚曰威弟子才亦有幹畧隨兄征討有功累遷信州刺史

孫瑒字德璉吳人少倜儻好謀畧梁太清之難授宣猛將軍軍主以王琳薦為宜都太守鎮巴陵拒侯景兵及克姑孰皆力戰有功封富陽侯累遷安西將軍郢州刺史周遣大將史寧率衆四萬攻郢瑒兵不滿千乘城拒守周師力攻踰月不克始退

瑒奉表歸陳歷散騎常侍中護軍督舟師平留異
終五兵尚書卒謚曰桓

陸山才字孔章吳人為南豫州刺史周文育長史
文育討克蕭勃擒歐陽頔計畫多出山才累遷始興
王長史行東揚州事從侯安都討平留異除明威
將軍東陽太守歷度支尚書宣帝南征周迪以山
才為軍司又余孝頃自海道襲晉安山才以本官
之會稽指授方畧卒謚簡子

五代司馬福吳人多智而善水行始隸吳越王水軍
為游奕都虞侯梁開平三年淮人圍蘇內外阻絕
王遣援兵至莫知城中音問福潛行水中三日入
城取軍號而出內外夾攻號令相應淮人以為神
遂大敗之

宋章綦字質夫父訪禮賓副使自浦城徙蘇綦舉進
士甲科元祐初以直龍圖閣知慶州夏人入寇綦
伏兵擊敗之召權戶部侍郎哲宗命知渭州築瓠

蘆河川二城據形勢以偪夏又遣將夜襲夏統軍
及監軍帳俘馘二千餘獲牛羊十萬羗部震駭進
端明殿學士徽宗立累拜同知樞密院事卒謚莊
敏子緯字伯成綜字子京俱有文名歷官著聲績
緯終禮部郎中綜右文殿修撰

盧秉字仲甫父光祿卿革自德清徙蘇秉皇祐初
登上第元豐中知渭州西討有功又命將襲夏胡
盧川俘斬萬計遷龍圖閣直學士夏人大舉入寇

乘駐兵瓦亭分兩將駐靜邊砦及夏兵至縱擊之
皆奔潰後奉祠歸卒子知原字行之建炎初知溫
州時鄰郡並陷知原保障一方屹為重鎮擢管內
安撫使法原字立之紹興中宣撫川陝前後屢捷
卒于軍中

丘岳字山甫常熟人以進士授太湖尉紹定中應
趙范趙葵之辟預平淮寇李全端平三年知真州
擊退元兵寶祐初歷沿江制置使調兵解和州之

閩岳屢禦大敵未嘗少敗理宗嘗御書忠實二字
賜之

明韓雍字永熙長洲人正統壬戌進士授御史累遷
古僉都御史巡撫江西大同宣府所蒞著聲績成
化初兵部尚書王竑薦雍總督兩廣軍務討叛苗
既克修仁荔浦諸峒進攻大藤峽力戰破賊俘斬
無算遂平其穴及雍以憂歸廣寇復發朝命仍起
雍定之雍磊落有大節具文武才畧南蠻震懾以

父呼之而不名卒謚襄毅

陳俟字汝翼吳縣人左都御史鑑從子景泰卒未
進士授南御史理鹺政有賢名擢四川僉事天順
時叙南土獠肆掠大軍進討俟率兵前驅破其寨
十餘兩月不釋甲已而夾江花溪諸盜及漢州德
陽所在擾動蜀撫重俟才檄之往勦至即殄平後
以會黔帥議事還舟覆溺死時論惜之

孔鏞字韶文長洲人雙流知縣友諒子景泰甲戌

進士成化初以葉盛薦自連山知縣擢高州知府
時賊屯境內者十餘部鏞以次招撫之他賊入犯
者先後多敗去境內大定擢按察副使分巡雷高
二府敗廣西寇進按察使平荔浦賊歷右副都御
史巡撫貴州雞背苗恃險為亂旋亦討平入為工
部右侍郎道卒

陸完字全卿長洲人成化丁未進士授御史有聲
臺中正德中累遷兵部右侍郎流賊劉六劉七等

起霸州勢日熾詔完督諸軍討之賊屢敗復集畿
輔山東河南以及江淮所在被躡完跡賊所向頻
擊破之勢始大蹙殲於通州狼山進左都御史歷
吏部尚書後坐與宸濠交遣戍卒

陳天祥字元吉吳江人弘治丙辰進士正德中歷
天津兵備破流賊劉六等俘斬甚多巡撫貴州平
峒苗尋奉命提督三邊軍務西陲無警兵民安堵
吳寅字敬夫常熟人弘治乙卯舉人正德中官武

昌同知流寇劉六趙璲犯境寅攝守事率兵敗之
江中六中矢墮水死璲遁入武當寅以計誘擒之
檻車送京師伏法

朱紉字子純長洲人正德辛巳進士嘉靖中歷四
川按察副使平深溝諸砦番累遷右副都御史撫
贛尋倭寇起改撫浙閩賊據雙嶼島遣將擊破之
又督兵追敗賊于溫盤南麂諸洋還平處州礦賊
會佛郎機國人行刳至詔安紉擊擒其渠魁悉戮

之御史劾專殺罷職聽勘仰藥死紃在事三年屢
殲巨寇人多惜之

鄭若曾字伯魯崑山人幼有經世之志凡天文地
理山經海籍靡不周覽嘉靖中島寇擾東南總制
胡宗憲大帥戚繼光皆重若曾才事多諮決後以
倭平議功論授錦衣職辭弗受所著有籌海等書
陸一鳳字子韶常熟人嘉靖壬子舉人授泉州府
同知奉臺檄討海寇林鳳大破之孫問禮字衷虛

萬厯甲辰進士歷都御史巡撫南贛平九連山銅鼓嶂諸寇

蔣夢龍字子徵長洲人嘉靖乙丑進士累官湖廣參議討大圍山賊擒其渠魁餘黨讐服復請置戍山麓以絕禍本同時吳江皇甫渙由進士歷廣東參議平苗亂及惠潮劇賊

支可大字有功崑山人萬厯甲戌進士歷湖廣巡撫嘗降九服白泥諸寨又連破黃岑高岩乾溪寶

兒國闢開京觀遂長驅入播七戰唐堡破板角關
又三戰煉砮克苦菜關一時功績特偉尋致政歸
同縣朱國輔字左車萬厯乙卯舉人明季以保寧
府檢校署知瀘川州事力拒流寇有保境功移福
州府檢校攝福清篆擒斬劇盜終開封府推官

黃時雨字化之常熟人萬厯甲戌進士知惠州府
平岑崗苗江月照之亂遷廣東副使再平海盜同
縣趙隆美字文度以父用賢蔭歷叙州知府天啟

初擊退叛酋奢崇明兵

蕭應宮字觀復常熟人萬曆甲戌進士知東昌府
擒劇賊散其黨備兵臨洮邊境不靖應宮盛暑擐
甲張疑設伏敵不敢犯會倭躡朝鮮應宮以遼海
道監東征軍無程趨王京止退守鳴綠之議既而
揭制府冒功奏捷為所搆遂得罪

陳禹謨字錫元常熟人刑部侍郎瓚子萬曆辛卯
舉人歷官貴州參議黔師有事于勻哈禹謨奉命

監軍先誘斬其謀主遂分兵拔賊寨凡二十有一
其一曰馬蹄有洞阻險賊所窟穴用火攻殲焉饒
石紀功而還

陳必謙字益吾常熟人興寧知縣交魯孫交有廉
名必謙舉萬曆癸丑進士天啓中官南御史以疏
論挺擊移宮二案及劾戚臣鄭養性削籍崇禎初
起原官累擢都御史撫河南時流寇大熾必謙率
兵援靈寶大破賊于朱陽山繼復有九臯山屹料

鎮諸提頻挫賊勢歷工部尚書

國朝何棟字與偕長洲人由崇明籍舉順治丁亥進士
除邵武府推官攝福州府篆時閩師悉赴泉州經
略廈門會城空虛海寇鄭成功率衆自海道襲福
州巡撫宜永貴瘍發於首不能視事因素重棟才
盡以城守諸務委之棟力請釋原任布政使周亮
工於獄共扼險禦賊賊攻城十三晝夜棟竭力固
守危城獲全入為戶部主事歷江西提學僉事告

歸卒子炯字倬雲煜字章漢並舉進士有名炯累
官雲南僉事煜終南陽知府

松江府

明衛青字明德華亭人起軍伍積功官都指揮僉事
備倭海上永樂中妖婦唐賽兒作亂攻安丘甚急
青從海上率千騎晝夜兼行城下擊破之降勅褒
美陞都指揮使進都督僉事以旱禱得疾卒登萊
人立廟海上祀之子潁字源正以勇幹聞正統己

己之變從山東入勤王以功多擢都督同知出守
宣府還領京營兵預奪門功天順元年陞左都督
封宣城伯充總兵官守甘肅羌謀入寇連十二戰
大破之又敗西番於涼州卒謚壯勇

張祚字永錫華亭人景泰甲戌進士授御史遷廣
東按察僉事廉慎精密嶺表信服之會韓雍討蠻
寇以祚有才識檄使從征大破靈山縣及高廉二
州諸賊祚雖用兵不樂以武節見新興新會民多

通盜東莞土豪倡亂皆解散之誅首惡而已擢河
南副使致仕歸

常州府

晉孫無終晉陵人太元初苻堅方盛謝玄鎮海陵多
募勁勇無終為前鋒每戰必勝號北府兵敵人畏
之

南北朝宋蒯恩字道恩南蘭陵人從討孫恩先登膽
勇過人帝漸寵任之平京口定建業封都鄉侯從

伐盧循斬徐道覆與王鎮惡襲江陵隨朱齡石伐
蜀前後百餘戰錄功封新寧伯

蕭思話南蘭陵人宋元嘉中為青州刺史時司馬
朗之兄弟聚黨為亂討平之又為梁南秦二州刺
史平氏帥楊難當悉收所侵地其後起兵應孝武
用為中書令丹陽尹卒贈征西將軍開府儀同三
司謚穆侯

梁陳慶之字子雲義興人大通初除宣猛將軍渦陽

之役與魏軍相持凡數十戰斬獲略盡奉詔送魏
北海王顥還魏凡取三十二城顥乃得入洛還除
右衛將軍出為北兗州刺史有妖僧攻陷北徐州
慶之討平之歷南北司二州刺史加都督破魏兵
於淮上大同五年卒謚曰武慶之性謹慎善撫軍
士得其死力

魚天愍義興人隸陳慶之麾下攻魏滎陽天愍踰
堞先登將士蟻附而上遂執其都督楊昱

陳周文育字景德義興人隸陳慶之麾下與白水蠻戰身被九創慶之偉其節後從陳武帝戰白城抽槊陷陣殺傷數百人以功封壽昌縣公終司空蕭摩訶字元印南蘭陵人驍勇有名大建中從都督吳明徹北伐深入敵陣斬將塞旗屢敗齊軍以功授譙州刺史歷官車騎大將軍

周寶安字安民陽羨人父文育南征敗沒起寶安為猛烈將軍領父舊兵仍令南討世祖深器重之

及平王琳勦熊曇朗征留異並有功歷左衛將軍
領衛尉卿卒謚曰成

隋陳杲仁字世威晉陵人仕陳未久即乞歸養事繼
母以孝聞隋大業中奉詔平長白山諸寇又剪東
陽賊二十萬拜大司徒尋為沈法興所害屢見神
于郡郡立廟祀之南唐封武烈大帝命徐鉉撰碑
文

唐衛遼陽羨人隋末游并汾間唐初建義旗遼以武

勇從軍虎牢之戰擒竇建德逖持挾槊劍前突後擁太宗見而奇之歷禁衛將軍以母老乞歸

錢九隴晉陵人善騎射高祖愛之嘗置左右義兵起以功授金紫光祿大夫及克京城拜左監門郎將累立戰功封郇國公歷官右監門大將軍卒謚曰勇陪葬獻陵

薛士通義興人初仕隋為鷹揚郎將江都亂與州民嬰城拒賊武德初輔公柝反士通與其騎西門

君儀戰敗之柘平封臨汾侯

宋杜杞字偉長無錫人以祖鎬蔭補將作監主簿性
豪邁遇事敢為歷廣西路安撫使白崖山叛酋蒙
趕破環州攻桂管杞擊破其砦及五洞趕出降戮
之擢天章閣待制

錢之望字表臣晉陵人海陵督三十二總管南伐
臨采石之望以策干虞允文允文行其策果大捷
乾道五年登進士第授江西帥屬賴文政猖獗俘

之除知楚州募力士五百躬自訓閱大奚山盜起
除秘閣修撰知廣州擊其舟師一時摧滅陞華文
閣待制

向士璧字君玉常州人紹定五年進士累官湖北
安撫使知峽州合州告急赴援立功捐家貲百萬
以助軍費開慶初涪州危以計斷浮橋奏捷尋知
潭州元兵圍潭急率兵解圍進兵部侍郎兼轉運
使賈似道嫉其功為所害

明胡忠字企周宜興人正德戊辰進士歷廣西參政
劇賊王鏐土官岑猛戕守臣忠奉總制檄討之七
日平鏐猛遂遁匿以功擢撫延綏致仕歸時無錫
喻義由進士知南寧府土司爭立舉兵相攻義諭
以利害即解散

談愷字守教無錫人父一鳳弘治壬子舉人應山
知縣斷數年不決之獄擒劇賊愷舉嘉靖丙戌進
士歷遷副都御史巡撫南贛汀漳招降贛賊李文

彪殲海寇徐碧溪拜兵部右侍郎移鎮兩廣捕斬
峒蠻五千餘人平之卒贈右都御史

湯建衡字平仲宜興人嘉靖辛卯舉人授江西新
城令流寇三掠境內兩薄邑城建衡預遷附郭居
民入為堅壁清野計賊至躬親臨陣督兵拒敵屢
戰皆捷建衡生平以氣節自負尤長于議論

馬濂字濬卿無錫人嘉靖庚戌進士令僊居倭寇
黃巖將犯縣境濂擊走之歷守桂林從討洞瑤以

勞卒官時江陰陳臯謨以進士官南工部郎倭躡海上震畿輔謨督理南京城守亦以勤卒官

趙大河字道源江陰人嘉靖丙辰進士授義烏令時倭寇兩浙特簡民壯督習騎射總制胡宗憲檄監大將戚繼光兵上功幕府累擢浙江僉事監軍如故練兵講武所拔部曲後皆為名將

張夢時字伯可無錫人領萬厯癸卯鄉薦天啟中知安吉州擒劇盜葉朗生餘黨遷常德同知監偏

沅征蠻軍歷山東運同禦登州叛卒之亂累著功績

薛敷政字以心武進人萬厯丁未進士官御史按蜀土司奢崇明戕撫臣攻陷夔慶諸郡全蜀震動敷政便宜調兵固守成都三月中大小百餘戰危城得完又檄石砭兵赴援遂恢復諸郡再造兩川陳睿謨字常采武進人萬厯庚戌進士官御史忤執政外轉歷禹州兵備計擒巨寇擢撫偏沅討平

峒蠻

徐洪祚字式園宜興人萬厯壬子舉人授程鄉令
劇賊鍾陵秀等據銅鼓嶂勢張甚洪祚出奇計平
之遷荊州府同知攝府篆流寇犯境洪祚擐甲乘
城暑月不解帶者二十四晝夜賊始退

陸卿正字廷表武進人天啓乙丑進士官福建參
政海寇劉香老橫甚卿正往謁廣督力言主撫之
非并條上方畧督採用之香老焚死餘寇悉平同

邑鄒忠允官福建參議與平海寇

任允淳字還生宜興人天啓丁卯舉人授望江教諭署邑篆流賊躡皖隣邑皆潰知望江有備引去後賊率衆數十萬力攻者再誓衆死守危城獲全歷遷兵部主事時無錫黃廣由貢歷安遠令亦有禦賊守城功

堵允錫字仲緘無錫人崇禎丁丑進士由部曹為長沙知府山賊縱掠數敗官軍允錫督鄉兵破滅

之又討殺醴陵賊魁以知兵名後死潯州

徐調元字爾贊無錫人崇禎丁丑進士授黃岡知縣流寇至黃岡攻圍一月不克遁去官捕得盜三百餘人鞠之皆良民被刼者乃請上官誅其姦淫殺人者而釋其餘父憂歸起補金華許都為亂以宣大故帥房大成為謀主調元探其潛至城下設供張邀與計事遂縛斬以徇賊至一鼓破之搗其巢擒斬許都撫按交薦有旨召用時南都馬阮當

國遁歸不仕

趙德榮字臺侯武進人以歲貢授仙遊令斗栳寇
為亂德榮同張守備擒其魁李玉箴等繼殲其頭
目四十六人斗栳寇以平

章晉錫字用康武進人崇禎癸酉舉人特授戶部
主事出守延平有王銳頭者能驅草豆作人馬聚
萬餘人入延界為亂晉錫設方畧擒滅之尋陞本
省參政卒

鎮江府

明譚廣字仲弘丹徒人從成祖起兵積功為左都督
鎮宣府正統時以守邊功封永寧伯卒謚襄毅廣
奮跡行伍至大將大小百餘戰未嘗挫衄在宣府
二十年邊徼帖然時稱名將

張紹良字元貞丹陽人天啟壬戌武進士守備江
口晉遊擊分鎮淮揚定高寶湖中饑民之亂督兵
徐州遏流寇後調廣東參將陞副總兵官移疾歸

淮安府

唐楊士林淮安人隋末朱粲擁衆二十萬掠淮漢間
士林起兵攻之諸州皆應粲大敗士林率漢東四
郡降唐高祖以為顯州道行臺

張雄漣水人僖宗時與里人馮弘鐸合兵渡江壁
白下取蘇州遣別將趙暉據上元暉數剽江道雄
擊殺之自屯上元詔授昇州刺史未幾卒雄善馭
衆人思之為立廟

宋扈再興字叔起淮人有膂力善機變每戰被髮肉袒徒跣揮雙刀奮呼入陣人馬辟易北兵屢攻棗陽再興數拒却之授神勁統制頻立戰功尋病卒子世達官都統制亦以名將稱

明周于德世襲大河衛指揮歷靖州參將精勤明肅進右軍都督總兵江淮等處有功嘉靖乙卯倭犯浙統兵護糧運却寇金漕遷廣西鎮守撫勦猺獞功著嶺海

揚州府

南北朝宋陳憲廣陵人魏太武侵宋攻懸瓠甚急憲
以參軍行汝南郡事戰士不滿千人嬰城固守晝
夜苦戰積屍與城平魏主乃還以憲為龍驤將軍
呂安國廣陵人以建威將軍副劉劭征殷琰於壽
春降之安國勲第一封鍾武縣男

梁呂僧珍字元瑜廣陵人事梁文帝為門下書佐武
帝臨雍州為中兵參軍委以心膂大軍次江寧使

僧珍率精兵先登東昏將李居士來戰僧珍大破之武帝受禪為冠軍將軍封平固縣侯帝欲榮以本州乃拜南兗州刺史僧珍在任禮見士大夫平心率下不私親戚

陳杜僧明字弘照廣陵人形貌眇小有膽氣善騎射陳武帝引為長史隨討侯景歷有戰功除南兗州刺史進爵臨江縣侯

隋來護兒字崇善江都人好立奇節嘗嘆曰大丈夫

當為國滅賊以取功名安能久事隴畝後以平陳
功進位上開府從楊素李寬擊賊皆破之進位柱
國兩將兵渡海擊高麗封榮國公江都之難為宇
文化及所害

唐王式起子大中間為晉州刺史徙南安都護時忠
武戍卒與交趾通夜圍城合譟式盡捕斬之除浙
東觀察使平賊裴甫又定徐州銀刀軍亂晉尚書
徙武寧節度使終左金吾大將軍

明李義其先沛人家揚州父榮洪武初以彭城歸附
義嗣千戶累官指揮僉事從黔國公征安南至大
安梅口與賊大戰力竭而死于敬永樂中統戎赴
交趾戰功最多

陳珪泰州人洪武初為燕山中護衛從燕王出塞
為前鋒進副千戶後從靖難積功封泰寧侯卒贈
靖國公謚忠襄

顧成字景韶江都人初侍太祖充帳前親兵累功

佩征南將軍印平定貴州即命鎮守永樂初封鎮
遠侯威震百蠻卒謚武毅曾孫溥嗣爵弘治時拜
平蠻將軍鎮湖廣詔討都勻叛蠻富架誅之八掌
前軍都督府事卒之日囊無餘貲

曹義字敬方儀徵人宣德初平江西梅花洞賊正
統間擢左都督僉事充總兵官鎮遼東廉介有守
遼人安之與兀良哈大小數百戰天順初封豐潤
伯

蔣貴字大富江都人從燕王起兵積功陞都指揮
僉事宣德中討平松潘諸番佩平蠻將軍印鎮守
其地正統初移師討阿台大破之封定西伯進侯
孫琬嗣爵成化中帥京軍防秋大同宣府陳機宜
十餘事皆報可琬子驥嗣侯歷鎮薊遼湖廣二十
年家無餘貲

許貴字用和江都人永新伯成之子正統時守備
大同英宗北狩貴激戰士以忠義屢擊敗敵天順

初以副總兵鎮守松潘詔便道先翦山都掌叛蠻連破四十餘砦賊遠遁貴亦感嵐氣卒子寧字宗道成化時充大同遊擊以功歷進都督同知大小百餘戰身被七十二創威名聞於異域

仇鉞字廷威江都人世襲指揮同知以功陞指揮使充寧夏遊擊將軍驍勇敢戰正德間安化王寘鐸反鉞稱病不出陰約諸兵至河上從中發為內應而誘寘鐸黨周昂來視疾捶殺之即披甲上馬

出門大呼諸兵皆集遂擒寘鐸械送京師論功封
威寧伯以平流賊劉六等功進侯爵卒謚武襄
彭天翔字鵬甫江都人萬曆癸丑武進士歷官副
總兵討山東白蓮賊大捷會魏璫建祠天翔不往
拜被斥璫敗詔復其官

王繩堯字又元江都人天啟壬戌武進士累官四
川南路總兵土司奢酋犯順設計殄之大著威望
徐州府

漢夏侯嬰沛人數從高帝戰有功賜爵至列侯封汝
陰帝初起沛嬰常為太僕從竟高帝崩以太僕事
孝惠帝歷事高后文帝皆為太僕卒謚文

謝安下邳人順帝建康元年陰陵人徐鳳寇掠郡
縣自稱無上將軍安應募率其宗親設伏斬之封
平鄉侯

度尚字博平沛人為上虞長莅政嚴明尚書朱穆
舉為荊州刺史擊零陵桂陽諸賊悉平之封右鄉

侯後為遼東太守破鮮卑遠人憚服

三國魏劉岱字公山沛人以司空長史從魏祖征伐

有功封列侯

史渙字公劉少任俠有豪氣魏太祖初起以行中
軍校尉從征伐常監諸將見親信轉拜中領軍

吳張奮昭弟子年二十造攻城大車為步騭所薦昭
以其年尚少奮曰昔童汪死難子奇治阿奮實不
才耳於年不為少也領兵為將軍連有功封樂鄉

亭侯

晉劉牢之字道堅彭城人面赤紫色鬚目驚人沉毅多計畫太元初謝玄鎮廣陵以牢之領前鋒百戰百勝號北府兵北破苻堅南走孫恩累進都督征西將軍領江州事子敬宣智略不及父而技藝過之隨父征討所向有功歷遷征虜將軍青州刺史劉毅字希樂沛人少有大志不事生產桓玄反毅與劉裕何無忌起義兵討玄以匡復功封南平郡

開國公兼都督宣城軍事尋轉衛將軍開府儀同
三司江州都督後以貳於裕被攻衆散而縊

南北朝宋劉懷肅彭城人武帝從母兄征孫恩有戰
功為費令後為司馬斬桓振平江陵封東興縣侯
弟懷敬懷慎懷默俱顯懷敬子真道錢唐令有美
政為刺史討破楊難當加建威將軍懷慎以平廣
固及盧循功封南城縣男懷慎子榮祖以戰功參
太尉從擊司馬休之與北伐俱以寡尅衆攻無堅

城賜爵都鄉侯

劉鍾字世之彭城人從伐孫恩從征廣固直入敵陣奪孟龍符之屍而還拒盧循追斬徐道覆封永新縣男

朱齡石沛人家世將帥宋武帝以為鎮軍參軍伐蜀有功封豐城侯弟超石亦果銳累官中書侍郎到彥之字道豫彭城人宋武帝時屢立戰功進爵為侯佐守荆楚垂二十年後與檀道濟同討謝晦

平之遷南豫州刺史鎮歷陽卒謚忠

垣護之字彥宗下邳人父苗屯騎校尉護之氣幹
強固宋文帝末領濟北太守戍淮陰孝武入討劬
率所領馳赴帝以為冀州刺史及南郡王義宣反
護之率軍擊魯爽累遷青冀二州刺史鎮歷城徵
為右衛將軍於道聞竟陵王誕反廣陵即率部曲
受沈慶之節度事平轉臨淮太守徙豫州刺史卒
謚壯

齊垣崇祖字敬遠護之弟子年十四有幹畧護之謂
門宗曰此兒必大吾門後隨徐州刺史薛安都入
魏尋又率門宗據朐山歸宋除北琅邪蘭陵二郡
太守封下邳子及齊高帝鎮淮陰以崇祖武勇善
待之踐阼之初徙為豫州刺史敗魏兵于壽春又
大破于下蔡

唐路審中徐人崔彥知其能任用之彥遇害審中賂
守卒斂藏其尸張元稹攻徐州審中率死士應官

軍遂破之官至嵐州刺史擢右羽林將軍

劉沔字子汪彭城人父廷珍以戰功封東陽郡王
太和中沔為神策將遷大將軍擢涇原節度使突
厥劫營田沔擊之無一轡還者會昌初拜河東節
度回鶻寇雲州沔大敗之功加檢校司徒徙忠武
節度使

石雄徐州人少為牙校敢毅善戰從王智興討李
同捷先驅鼓行無前會昌初回鶻入寇詔雄為天

德防禦副使無朔方刺史佐劉沔屯雲州迎還公
主進豐州防禦使討劉稹越烏嶺破賊斬獲多雄
臨財廉每朝廷賜與輒置軍門自取一足縑餘悉
分士伍衆咸感奮武宗曰今將帥義而勇罕雄比
者後拜神武統軍卒

劉巨容徐州人為州將龐勛反巨容自拔歸授
橋鎮遏使浙西王郢反攻明州巨容以筒箭射郢
死擢明州刺史徙楚州黃巢亂江淮授招討副使

累破巢進南面行營招討使封彭城縣侯為田令孜所殺

時溥彭城人為州牙將黃巢亂僖宗命溥為武寧節度悉師討之連戰輒克逐尚讓於太康以破賊功第一加檢校司徒累遷太子太師與朱溫構怨戰不勝登燕子樓自焚死

五代梁朱珍蕭人從太祖創立軍制選將練兵甚有法度嘗敗黃巢破秦宗權東并兗鄆勇出諸將右

拜淄州刺史後擅殺李唐賓縊死

金曹珪徐州人大定初州人江忠作亂珪子弼成在城中珪謀誅忠並弼殺之金主云赤心為國大義滅親特進三官於正班用之

元匡才睢寧人仕金為武略將軍歸元授沂邳東河監軍袁萬作亂大破之加兵馬使徐守張名叛復敗之進元帥後宋兵大入境戰不利死之子國政明倪寬邳州人精武藝元末糾集民兵歸附太祖累

立戰功官至後府都督僉事

薛顯蕭人少通韜畧膂力絕人元末大亂顯斂兵自衛至明初率所部來歸附擢親軍都指揮分鎮江西從征荆楚遷右丞從大軍北定齊魯燕冀論功封永城侯卒贈永國公謚桓襄

陳政邳州人洪武初集兵從征驍勇過人所向有功累遷中府都督

傅友德其先宿州人徙居碭山為太祖將擊陳友

諒破張士誠伐蜀累建功封潁川侯明昇既降太祖稱友德功第一又討雲南定蠻地進封潁國公每戰必先士卒身被創流矢中頰洞脅戰愈力

馬榮徐州人由永清衛所鎮撫從燕王征伐轉戰積功至右都督永樂中卒追封景城伯謚壯武

張欽睢寧人以騎士從燕王起兵累功為都督僉事卒追封新泰伯

陳敬瑒山人開韜畧永樂中以戰功官至中軍都

督僉事出鎮山海永平法令嚴明軍民懷服

山雲徐州人父青以靖難功累官都督僉事雲襲
金吾左衛指揮使宣德初佩征蠻將軍印鎮廣西
時溪峒猺獞數為患雲至先後大戰十餘蠻悉平
築九堡四城威惠並著遷右都督雲勇鷙有謀端
潔不苟取土人愛之正統時卒於鎮贈懷遠伯謚
忠毅

劉榮宿遷人初冒父名江隸燕邸驍勇多智略永

樂初積功為總兵官鎮遼東倭寇大至榮依山設
伏潛燒賊船舉旗鳴礮伏兵起賊大敗餘衆奔船
已燬亦就縛自是倭大創不敢復入遼東封廣寧
伯始更名榮卒贈侯爵謚忠武子安嗣

楊銳字進之蕭人嗣世職為南京羽林衛指揮累
遷都指揮僉事守備安慶宸濠叛圍安慶銳悉力
守禦久而圍解世宗立論功進左軍都督僉事充
總兵官鎮遼東

朱賢政蕭人幼讀書好騎射崇禎癸未應將材選授守備領後勁營分防徐邳有安撫兩河各寨功晉遊擊

國朝順治二年四月 大兵南下城破死

國朝吳汝球字來伯徐州人弱冠為諸生值流寇侵掠練民兵保護鄉里嘗以計擒偽官順治初從大軍定淮安授廟灣同知有招降功尋改通判寧波監造戰艦平大嵐諸山寇未幾移疾歸居鄉三十餘

年凡郡中有徭役興建及旱潦災禔之事輒首出金錢為倡年九十卒

汪廷對字迪宸碭山貢生有禦侮才順治初碭邑寇亂制府命領鄉營防禦有狂徒猝起據邑叛廷對不待大兵至先撲滅之制府嘉其績欲薦授官廷對以養親辭廷對又嘗修

聖廟及城角樓敵臺有功於鄉

韓元朗字熙子徐州人康熙九年武進士從征逆

藩靖海寇克復處州江山諸邑夜襲仙霞關降其將平福州署遊擊守泉州被圍衣甲不解者數月卒保其城累陞浙江金華副將乞歸卒

袁鈴徐州人康熙辛未武科榜眼以侍衛從征噶爾旦立功世襲拖沙喇哈番累遷總兵都督同知誥授榮祿大夫推恩其母董氏

聖祖御書萱庭晝暖四字賜之

太倉州

明張洪字宗海太倉人本侯姓幼撫于張嘗以鄰家
事連坐戍雲南黔寧王一見器重用其策平木邦
之亂永樂初為行人出使日本再使吐蕃會緬甸
宣慰郝羅塔殺孟卷宣慰刁木旦而據其地洪奉
詔詰責凡六往返始復命後以修撰致仕杜門著
書者數年乃卒

徐瑄字子敬嘉定人正統間進士以御史巡京畿
按川廣所至有聲巡撫綏四戰俱捷璽書獎勞

後以疾致仕

王倬字用簡太倉人成化戊戌進士歷知餘干縣
值贛盜殺永豐令檄倬往勦賊據山險人莫敢進
倬夜縱羊千頭於山下鼓譟從之賊發矢石殆盡
比曉進兵平之擢南臺御史屢劾朝貴無所避改
瓊州兵備時生黎為梗倬聲言出兵而數移師期
以怠賊忽乘間進搗盡平其巢黎以永戢旋進右
副都御史巡撫順天屬縣大饑倬奏請通州米十

萬以賑又恐轉輸遲費許在邊官軍預支兩月糧俸益以餽直移官軍所在糧俸散饑民全活萬計仕至南京兵部右侍郎

凌雲翼字洋山太倉人嘉靖丁未進士萬厯初以兵部左侍郎提督兩廣軍務討平諸賊進征羅旁羅旁界東西兩山間延袤七百里每阻險剽掠雲翼大集兵四月克之鄰境猺獞皆懼伏奏設官戍之積患頓息又捕斬大廟諸山賊嶺表悉平遷尚

書總督河道加太子少保以病歸

海州

晉劉遵字慧明海西人為荊州都督劉道規諮議追斬盧循黨荀林於巴陵徐道覆寇荊州道規使遵為遊軍拒之及道規前鋒失利遵自外橫擊大破之歷淮南太守追封監利縣侯

明厲達海州人永樂間將兵征西涼取三十餘城西涼平遷都指揮鎮守其地卒

張瀛海州世襲千戶有謀畧正德間流賊連歲攻劫屢擒斬之賊畏懼稱曰海張及守邳州賊數萬攻城瀛率五十餘騎直當其衝連發三矢三中渠首賊衆驚曰海張至矣遂遁去州民獲全

通州

明陳大壯字思立通州人嘉靖壬戌進士以刑部郎出知敘州府督餉勦九絲蠻時積雨山險不能進會九日大壯偵知蠻俗重賽會乘夜進兵懸絙而

上殺獲無算拓地五百餘里晉山東參政乞歸養
郭師古字時用如皋人性英敏通知武事萬厯丁
丑進士由郎中出知廣州平土酋半天雲之亂擢
甘肅兵備晉陝西左參政罷歸著百將傳籌邊紀
畧八陣圖說諸書

國朝馮用表字春華通州人性機敏有膂力明季積功
至總兵官順治二年大兵南下隨貝勒東征駐守
衢州改鎮台州次第削平金華紹興山寇皆有功

江南通志卷一百五十一